

SE Gobernador Refunjol y Directiva di Prins Bernhard Cultuurfonds masha impresiona cu Museo Arkeologico



ORANJESTAD - Manera conoci Diabierna dia 27 di maart directiva general a tene e prome reunion di 2009 den “Fruteria” di Museo Arkeologico. Prome cu reunion a cuminsa oficialmente, e arkeologo Harold Kelly y e colaborado educativo Margarita Wever a duna un rondleiding den e Museo Arkeologico situa den “Cas di famia Ecury”

Gobernador Refunjol y e demas miembronan di PBCF a keda hopi impresiona cu e bunita di e edificio monumental y majestuoso despues di e restauracion total cu a tuma lugar durante e ultimo añanan aki. E contenido di e coleccion di Museo a worde poni na un manera hopi profesional, moderno y hopi yamativo pa usuario di tur edad. Un caluroso pabien na Vivi Franken-Ruiz y su team cu a percura pa cada detaye haya su debido atencion!

Gobernador Refunjol a haci entrega di cheque cu ta cubri e subsidio pa e proyecto di Festival di Piano bow direccion di Sr. Armand Simon y tambe sra Wilma Kuiperi- Jansen a ricibi un cheque pa Fundacion Artland. Den nomber di tur artista y esnan laborando riba tereno cultural sra Wilma Kuiperi a gradici Bernhardfonds pa su aporte valioso na cultura di Aruba. E subsidio con poco cu e por ta, ta un estimulo pa sigui traha y sigui perfecciona nos mes.

A toca Sr. Oslin (Chin) Boekhoudt pa a ricibi e premio prestigioso cultural di Prins Bernhard Cultuurfonds for di man di Gobernador, Regent di Prins Bernhard Cultuurfonds! Cada 2 aña e premio aki ta worde

otorga na un persona cu a destaca riba tereno cultural.

Sr. Chin Boekhoudt tin un trayectoria hopi largo y impresionante riba tereno di teatro, tanto local como regional y internacional. Den su palabra di gradicimento Sr. Chin Boekhoudt a expresa su gratitud y orguyo pa por a ricibi e premio special aki. Pa coincidencia ta toca e mesun Sr. Chin Boekhoudt kende a skirbi e monologo “Sonrisa di Max”, cual ta e storia di e heroe nacional Boy Ecury, pa ricibi e premio den cas caminda Boy Ecury a nace, esta Cas di famia Ecury den Schelpstraat. Prins Bernhard Cultuurfonds ta dispuesto na financia e ondertiteling di “Sonrisa di Max” cual a worde poni riba DVD.

E reunion a conta cu presencia

di entre otro Gezaghebber di Bonaire mr Glenn Thode y representantenan di gezaghebbernan di Saba y Sint Eustatius, fuera di Presidente Sr. Winthrop Curiel y demas miembronan di Corsow.

Pa Aruba a worde trata y aproba e proyecto di Museo Arkeologico titula “Rancho” (F. 25000) y e proyecto di Fundacion Heart of San Nicolas (f. 25000) y subsidio parcial pa publicacion di e buki nobo di sra Tchong-Engels.

Despues di un almuerzo hopi special na Chez Mathilde, departamento Arubiano di BNA den Bachstraat a worde bishita. Hopi aprecio tabata tin pa e departamento aki cu tin un caracter hopi agradabel y trankilo, un ambiente cu ta invita pa haci investigacion.